

李登輝 · 姜琦 · 柳藩國

周邦道

當代教育先進傳之九

李登輝 (1873-1937)

李登輝、字騰飛，福建同安人。父開元，母沈氏，以清同治十二年三月二十四日，生於荷蘭屬爪哇巴達維亞郊外之紅巴村。年十五，讀書新嘉坡，十九歲赴美國，入耶魯大學攻文哲諸科。

二十八歲至檳榔嶼，任英華書院英文部主任。會孫中山先生集會提倡革命，登輝與焉。三十歲任巴城耶魯學校校長。光緒三十年返國，至上海，與顏惠慶、王正廷、曹雪庚等創辦寰球中國學生會，為會長。同年秋，馬良創立復旦公學於吳淞，延為總教習。登輝之盡瘁於本國教育，實從此始。後嚴復、夏敬觀、高夢旦相繼任監督，登輝為教務長。嘗先後任江南留學生考試官，及浙江省派赴美國留學生主試。宣統三年，任共和西報主筆，兼任教中國公學。

革命軍興，武漢軍政府黎元洪都督邀登輝主持外交，不赴。南北議和，為南方代表伍廷芳顧問。民國元年，復旦公學遷徐家匯。翌年，馬良

以年老倦勤，時校董會初成立，董事長孫中山先生等乃推登輝為校長。六年，公學改組為大學，設文理商三科。登輝躬赴南洋諸地募捐，七年返國。先於江灣購地為校址，十年開工建築。既成，遷大學部於江灣，而以徐家匯校舍為中學部。

後再赴南洋募捐，回國設復旦實驗中學。二十三年，以自置江灣私地建福童所，收集失學街童，施以教養，俾成一藝以自立，其弘濟博施如此。

登輝主公學至大學，凡二十五年，以年老乞休。然校中大事必以諮之，實未嘗謝事也。時錢新之為代理校長，吳南軒為副校長。登輝旋有立法委員之命，辭不就。日本入寇，學校內遷，師生未能成行者，皇皇不知所出。登輝乃設上海復旦大學補習部於舊公共租界。迨太平洋戰事起，寇侵租界，敵偽欲羅致人望，以資號召。密議脅登輝及張壽鏞，壽鏞先有所聞，稱疾不出；並遣人奔告登輝，得易名匿跡一年，敵偽之相伺漸懈。而復旦補習部亦以避地三遷，終得復課。抗戰八年中，登輝以退養之身，於校事鉅細躬親，一

如往昔。新生學籍及畢業生成績，皆按時報部，密寄陪都。三十四年乙酉，抗戰勝利，復旦已改國立，章益三繼吳南軒為校長；而登輝則始終助之。附屬中學及附屬實驗中學，則仍為私立，登輝任兩校董會董事長並兼兩校校長如故。逐日到校，寒暑無間。至是兩目昏翳，未遑將息。三十六年十一月十九日，以風疾轉肺炎長逝，時年七十有五。平生律已甚嚴，自奉尤儉，凡一切脩薪版稅所入，必以十之一捐贈公益慈善事業，故身後了無長物。

登輝敏而好學，精研英、法、德、拉丁、希臘各國語文，於英國文學造詣尤深。早歲嘗為中華書局英文總編輯，所著之李氏英語修辭學，文化英文讀本，李氏英語文範，及中國問題之重要因素等書，傳誦一時；聖約翰大學以文學博士學位贈之。平生心力，萃於教育文化，絕意仕宦；而於社會公益事業，則樂就不辭。其處事也，取決衆意；於校務，有行政會議之制。其設教也，則誘掖獎勵，必使信而後從。其所恆言，謂「必肯

犧牲乃有爲，必樂服務乃有用，必能團結乃有力。可以警時俗、救人心。方初長復旦時，董事長既爲 國父孫先生，校董有先烈陳英士，副校長則爲王寵惠。一時革命黨人，如于右任等，皆出入餐舍，校址所在地之徐家匯，乃蔚爲革命之營壘。其後復旦人才輩出，有由來也。

登輝既卒，國民政府明令褒揚，謂其創辦寰球學生會及復旦大學，以宣揚文化，訓迪後進爲己任。融貫中西學術，而歸之修己立人。弟子遍海內，皆有所成就。迭經鉅變，而不改易其貞固之德，矜然之操。此於登輝之志事品概，信非溢美矣。

(本國立復旦大學印李登輝校長事略。)

姜琦 (1886-1952)

姜琦，字伯韓，浙江永嘉人。先世以德行文華，爲鄉里楷式。生於清光緒十二年丙戌五月初八日。少孤露，奮發自立，以科舉非求才之方，學術爲拯溺之具；乃遠適日本，六年而歸，畢業東京高等師範學校及明治大學。回國，任溫州浙江省立第十師範學校校長，南京高等師範學校教授。民國八年冬，杭州第一師範學生施存統，於「浙江新潮」發表「非孝」一文，掀起軒然大波，經校長亨頤辭職。翌年春，教育廳派琦繼任，延聘劉延陵、朱自清、俞平伯等任教，諸生翕然。十年夏，回至南高。踰歲，教育部派赴美深造，從名教育家杜威遊，任丙辰學社即中華學藝社美國東部幹事。十四年夏，得哥倫比亞大學教育碩士歸，繼趙正平爲暨南學校校長。曾擬訂暨南

改進計劃，將其與東南大學合辦之商科大學，擴充爲五個學系。至十六年夏辭職，由鄭洪年繼長時，則更名國立暨南大學矣。

是年秋，被推爲上海浦東中學校長，兼大夏大學教授。十七年春，任日本留學生監督，兩年返國，歷任國立廈門大學教育行政系主任，安徽省立大學文學院院長、湖北省立教育學院院長，壁畫施展，諸奏嘉績。二十三年夏，福建省政府主席陳儀，舉辦綜合性之省立師範學校，邀任校長，培育全省小學師資，同時回兼廈大教授。抗戰期內，轉任教育部訓育委員會專任委員，參事等職，其間，曾出任國立西北聯合大學教務長，先修班主任，國立浙江大學訓導長，國立社會教育學院及中央大學教授，汲汲孳孳，固未嘗一日息也。

著述修隆，其在中華、商務、華通、正中、群衆等書局出版者，計有：中國國民道德概論，西洋教育史大綱、福勒伯爾傳、知難行易與教育、三民主義課程論、教育史、教育哲學、現代西洋教育史、抗戰建國與民生哲學、訓育與心理、生活管理、德育原理、中國國民道德原理等十餘種。另與邱椿合著中國新教育行政制度研究，戰後之西洋教育，與楊慎宜合譯瓦格涅視學綱要，與杜佐周合著普通教育。勝利後，臺灣行政長官陳儀，邀任公署簡任參議，兼台灣省編譯館編纂，暇則兼任臺灣省立師範學院教授。嘗輔助臺北市長游彌堅，籌計教育行政綱領，自黃啓瑞出任教育局長後，則專致力於臺灣省教育廳編審委員會工作。曾刊布教育新論、三民主義哲學、三民

主義體系釋義，中國國民道德，臺灣省鄉土教育論等書，均膾炙人口。

琦博綜群學，折衷至理，而會歸於三民主義。以國民道德爲教育先務，一再著述。是誠闡揚國父遺教之巨擘。性本通方，哀樂不以經懷。晚而好詩，宛轉近情，略似香山居士。夙患哮喘之疾，遭亂流離，有加無已。四十一年十一月一日，竟以是卒於臺北，年六十有六。

(本伍做：姜琦先生事略，姜伯韓先生手訂著作書目，秦賢次：姜琦先生事蹟)

柳藩國 (1887-1959)

柳藩國，字潛植，江西萍鄉人。先世以儒學教授鄉里。生於清光緒十三年丁亥某月日。幼而岐嶷，弱冠府試，膺第一名，爲廩膳生。師事同邑蔡紹南、劉存一，又友鍾震川。劉、鍾固同盟會會員，因得諷鄒容、沈蕙諸先烈書，遂毅然加盟。丙午萍醴之役，就上栗市響應，事敗幸未株連。辛亥光復，方任栗江小學校長，校門率先豎白幟，並策動新軍胡謙起義。民國紀元，代表萍鄉出任江西臨時省議會議員。聯合同志彈劾都督馬毓寶，比其去職，公舉李烈鈞繼任，奠定省局。在議席警譚持正，爲時所重。

南昌教育先進熊純如育錫，敬其學識品誼，延任心遠中學監學。因素以育才進士爲樂，欣然就聘。三年甲寅，育錫長省立第二中學，復聘爲監學，校務鉅細，悉以委之，無異副校長也。性固峻毅，而於諸生，則寬嚴相濟，嘉善開失，道而弗牽，強而弗抑。每夕必周視寢室，寒爲覆衾，病爲召醫

，純摯懇款，如父兄之於子弟。嘗組團東渡，考察日本教育。歸而益崇科學，厲行「誠樸勤毅」之校訓。在任十三年，以身率教，孕毓學風，譽冠全省。及門弟子，多嶄然露頭角，揚鑣分道，所至有聲。

十六年，初任江西省教育廳科長，歷秘書、主任秘書等職。規畫周密，核閱詳審，每至夜分不懈。歷任廳長，皆敬禮之。三十三年，膺選中國國民黨江西省黨部監察委員，旋受聘國立中正大學訓導長。時正抗戰，校遷寧都石上，村居艱苦，人所不堪，而濟濟多士，翕然樂從。既復員，又以國民代表出席制憲國民大會，於文教國策，多所貢獻。三十八年，共軍進逼南昌，省主席方天為尊禮鄉賢，以專車護送着宿，避地贛南。迄後，獨藩國不長艱危，與夫人挈家孫復起（後留美羅徹斯特大學經濟學博士），間關潮汕，東渡臺島。教育部聘為特約編纂，閉居處約，泊如也。四十八年二月八日，卒於台北，年七十有三。

藩國畢生作育，學優行粹，研治諸史，尤喜陽明之學。篤信三民主義，有所論究，必推本國父。在臺嘗撰「人生經驗談」一書，略謂：人生須負荷愛護人類、整理萬物、促成進化三大責任。首應心存仁愛，並擴而充之，剷除自私自利之劣根性，實踐愛人如己道德；次宜精研科學、整理萬物，供利用厚生需要。再則當以教育力量，發展人性，去妄存誠。平居、飭躬厚俗，為政、福國裕民，俾物得其所，人遂其生，而躋於大同境域；是足以規其橫渠民胞物與之襟期矣。先後出身心遠中學及省立二中之士，感念熊校長

與藩國之教成，嘗於清江縣城創設中學，綴緝其 號，錫名「純潛」，景行高山之思，有足多者焉。

訂份中外雜誌贈送國內外親友是——

最好的禮物

一次贈禮。月月受惠

全年十二期新台幣三二〇元。二年二四期新台幣六四〇元

如代海外讀者長期訂閱，全年共新台幣肆佰貳拾元，兩年捌佰肆拾元，請將書款存入郵政劃撥儲金一四〇四四號中外雜誌社帳戶

海外讀者直接訂閱

全年十二期美金拾壹元，兩年貳拾元，請寄美金支票或匯票至臺北市新生南路三段七號之二

王道等著 中外珍聞

第二冊出版 定價陸拾元

「中外珍聞」內容包羅萬象，文字精采百出，每篇各成單元，全書富有歷史價值，百讀不厭，第二冊要目：王道：九九日軍投降記。

蔣君章：抗戰勝利與台灣光復。郭岐：南京大屠殺。趙宗鼎：憶戰時陪都重慶。褚問鵠：羅卓英揚威域外。費雲文：戴雨農與鄭介民。喬家才：張敬堯故都伏法等傑作十餘萬言。郵撥一四〇四四號中外雜誌社